

# In anteriur plevon catolic vul curar la religiun

Nova publicaziun davart ina cretta odierna

■ **(anr/vi) In plevon catolic daventa plevon reformà e scriva cudeschs. La chasa editura Zytglogge publitgescha «Religion ist heilbar». I va per la cretta, la scola e per ballape.** En ses emprim cudesch «Der Kopfstand auf der Kirchturmspitze» raquinta *Josef Hochstrasser* da la zesura dolorosa da sia vita: La maridaglia sco plevon catolic e la bandischada da la Baseglia.

Co vai oz cun l'augsegner d'antruras? En il fratemp è el daventà plevon reformà ed ha stuì far l'experientscha ch'i dat er en quella Baseligia qua u là testas quadras. L'entschatta dal nov cudesch «Religion ist heilbar» descriva el, co ch'el emprova da fitgar pe en la Baseligia reformada e da tschertgar ina piazza.

## Fieu e flomma d'instruir religiun

La finala sa tschenta Hochstrasser en la scola media a Zug, nua ch'el instruescha religiun e religiuns mundialas. Uschia sco el raquinta sentan ins immediat: El è in scolast passiunà ed è fiu e flomma per il rom ch'el instruescha. El chapescha da motivar ils scolars che vegnan activs ed organischeschan inscunters: p. ex. cun Curds, cun ina dunna che ha Sida, in analiticher da siemis etc.

«La bibla è bain la pli davosa pulenta!» provotgescha ina scolara il scolast. Immediat sa sviluppa ina discussiun plain tensiun. Ils blers scolars sustegnan la scolara che ha provotgà. Il scolast empermetta da tractar proximamain la tematica. Duas emnas pli tard stat il scolast avant la classa, tegna la bibla sur il chanaster da palpiri e dumonda «Duai jau bitter davent la Sontga Scrittira?» La classa quescha: «Tgi vegn davanttiers e bitta quest bestseller mundial en il rument?» Nagin che vul. La classa cumenza tuttenina er a discurrer da las qualitads da la bibla.

«Ha Dieu stgaffi il mund en sis dis, u betg?» è ina altra dumonda. Il scolast da



Il nov cudesch da Josef Hochstrasser.

religiun explitgescha ils puntgs da vista dals creationists e dals scienziads da la natura. Durant la discussiun elavura la classa la quintessenza: «In scenzià da la natura sa: Sia cumpetenza n'è betg la dumonda davart il senn da la vita. Da l'auter maun na sa lubescha la teologia betg da decider davart dumondas da la scienza natirala.

## Ina cretta differenziada

Ils onns che Hochstrasser è sa fatschentà a moda intensiva cun la religiun è el s'alontanà plaunsieu dal maletg tradiziunal ch'ins ha per ordinari da Dieu. In schurnalist ha perquai ina giada scrit cun lettras grassas en in purtret davart Hochstrasser «Gott im Himmel gibt es nicht». Il purtret cun quest titel sufficient ha chaschunà brevs da lecturs chargiadas, en las qualas i vegniva pretendi ch'ins na daschia betg laschar instruir in tal plevon. La fin finala han er ils scolars da Hochstrasser scrit ina brev da lecturs ed han envità ils critichers da vegnir a visitar ina lecziun da Hochstrasser.

La «cretta» da Hochstrasser n'è probabel betg descrivibla en duas-trais lingias da gasetta e na sa lascha betg bain reducir sin in confess banal da «gea, jau crai enten Dieu». «Per mai èsi pli impurtant d'explitgar la preschientscha da Dieu entaifer il mund sco forza positiva e d'accentuar sia energia comunicativa. Davart Dieu en las sferas ordaifer quest mund, pos jau be specular», scriva il scolast e plevon.

## È ballape ina religiun mundiala?

Ma sin las davosas paginas dal cudesch discorra Hochstrasser lura tuttina anc d'in Dieu palpabel e forsa bunamain banal – dal ballape. El sa dumonda, sch'il ballape è ina religiun mundiala. Il plevon sez è in «narr» da ballape, dat mintga sonda ballape e di ch'el scrivia suenter ils gieus adina ils megliers predis. L'extasa

dal public durant ils gronds gieus cumpareglia el cun l'extasa religiusa durant la meditaziun. E co èsi cura ch'ils giugadors, ils trenaders ed ils arbiters vegnan l'entschatta d'in gieu sin il plaz? Na sumeglià quai betg in pau la processiun dal papa en il dom s. Peder?

Hochstrasser fa ponderaziuns che pon parair blasfemicas. Ina milliarda umans è sin ina moda u l'autra colliada cun il ballape. En regiuns da pupira poscha il ballape a blers in radi da speranza. E plinavant: «Fans da ballape èn vairs cartents, sumegliant a quels ch'i dat en mintga religiun etablida.» La sbrinzla da passiun e da plaschair è – po dar – la medema.

**Josef Hochstrasser: «Religion ist heilbar». Zytglogge. 223 paginas. 36 francs. Oberhofen 2007.**

## Josef Hochstrasser

è naschì il 1947 a Lucerna, ha studegià filosofia e teologia ad Innsbruck, è stà scolast da creschids, spiritual catolic, ha maridà ed ha obtegnì in scumond da lavur da l'investg da Basilea. El è extrà da la Baseligia, ha lavurà sco manual en fabrica e studegià a la facultad evangelic-reformada a Berna. Il 1989 è stà sia ordinaziun sco plevon reformà. Dapi il 1991 è el scolast per religiun e religiuns mundialas a la scola chantunala a Zug.

Hochstrasser è in «narr» da ballape ed in bun enconuscent dal trenader *Ottmar Hitzfeld*. Els han scrit ensemen la biografia da Hitzfeld.